

mie, scrissi l'esser del signor Soldan in Aleppo, poi in campo, volendo andar a recuperar quelle terre sue prese per turchi etc., essendo poco lontan lo exercito turco, si preparò a la zornata, et a dì 25 di la luna dil passato, se trovò insieme et fo bel fatto, tal che el Soldan era vitorioso. Recludi i turchi et lassado assae butini, mamaluchi, che li parse esser vitoriosi, comenzò a robar, et el signor Soldano, andando per el campo cridando che i non robase e che i seguisse la vitoria, se stracò, et era tanto afanato che domandò da beber, et li fo portà una taza de aqua, et subito bevuto morite. Per alcuni di soi, et cui dize per el signor di Alepo, che morto el fo, è fuzito dal Turco e li feze intender, che *immediate* feze ritornar l'exercito et trovò mamaluchi che cargava i so cavalli de butini, et taiò a pezi et rupeli, *ita* che è rimasto vitorioso in campagna. Quelli machademi e mamaluchi restò in fuga, fuzi a Damascho. È morto turchi 35 mila, e de' mamaluchi, cui dize 500, eui dize 5000 (*sic*) con 40 armiragi, fra i qual ne è 8 over 10 de 1000 lanze, et del paese Carabi da 15 mila. A dì primo de la luna del presente, andò el Turco in Alepo, et ave quello. Mamaluchi  
 142\* è reduti, e sta a Damascho, et vol refarse per far un altra zornada. Avea dà paga ducati 4 per uno. Credo i habbi pochi danari per esser persa in Alepo la caxenda portò al Signor, che al Cajero non si trova danari de caxenda. Son certo, se 'l Turco non sarà impedito, che questi non potrà durar, et ho opinion che questi pochi mexi el spazerà i popoli in questo Egypto che el desidera per i rasonamenti fano. El fiol del signor è in Damascho, et fin hora non hanno fatto Soldan: ben fo dito di uno che fo zà signor a Tripoli Mir Diodar Saden, l'hanno fatto a Damascho, perchè al Cajero è pochi mamaluchi, da 3000 in zerca. El fatto cussì si ha per lettere dil Cajero. Quanto sia pericolosa questa impresa, Idio pol il tutto, ma se 'l Turco aquista sto regno, non valerà christiani svegiarse, perchè el potrà coverzer la terra e el mar de zente, cavali e galie. Non manderà in India 20 galie, come ha fatto el signor Soldan, ma in 6 mexi sarà signor de l'India con 50 galie, *maxime* che Soffi dil qual non si parla come non fosse. De l'armà de l'India non si sa nova alcuna. Fo ditto al Cajero quella esser tornada a Camaran, e havea mandà a domandar pegola e stopa per esser abisada: se le cose corerà come le cegna, non bisognerà che Portogalo mandi più in India etc. Lo ambador de Rodi, era al Cajero, fo expedito *ad vota*; li fo dà li so' presoni, et è partito per via de Damiata. *Etiam* el signor diodar grandò mi à mandà a donar li do

schiaivi, che fo retegnuti a tempo di sier Piero Zen, che fo dito la Signoria averli mandà dal Sofi, et per l'aqua de le chavalete havendo aperto tutte le preson per la morte dil signor Soldan; per la qual hanno auto ventura, è stati 6 anni in la Masera.

L'è zonto qui uno baba dil signor diodar grandò, con comandamento che io con la mia compagnia debba montar al Cajero, perchè presto ritornerà questo Signor, intende con i mercadanti; et questi do o tre che sono non pono montar per aver da far; anderò con el Vernaldi e Loredan, e in pochi zorni sarò qui a Dio piacendo. Son certo el voia qualche informazion de la guera, over de qualche signor christian, perchè altramente non si prevalerà sto regno: quanto sarà, per mie ne sareti avisato. De merchè poco si ha fatto. Al Cajero niuno vol vender dubitando che le monede non sia mose, perchè i crede, dovendo regnar el Turco, vorà si fazi perfete monede e ori. *Tamen* piper è in voze 135 etc. In questa hora è zonto un gripo, vien da Tripoli de mori. Riporta loro aver visto zente turcheche intrar in Tripoli, et esser per il Turco, e che a Damascho hanno fatto Soldan el dito Mir Diodar Saden. Si atenderà quanto opererà la so' stella; e dize alcuni dil gripo, che mamaluchi si va a pezo a pezo a la volta dil Cajero. Io non credo, perchè come i abandona Damascho i xè spazadi.

A dì 28. La matina fo gran vento e pioza, e 143 cussì tutta la notte è stato. Reduto el Colegio, nulla fo di novo. Fo chiamà Pregadi, per sier Hironimo Grimani el consier, per meter certa soa parte, e far, in luogo di sier Piero Venier, provedador sopra le fabriche di Padoa, *licet* sier Zuan Antonio Venier in Colegio parlasse, lui sier Piero non era compreso in la parte presa l'ultimo Pregadi; ma nulla li valse.

Da poi disnar aduncha fo Pregadi, fossemo poco numero. Fo leto le soprascritte lettere, et poi posto queste parte.

Fu poi leto una suplication di sier Andrea Donado, sier Zuan Batista Barbaro, sier Francesco Venier pagadori a l'Armamento, atento nulla vada gnano, li sia levà la tansa durante la parte la mità. *Unde* fo posto, per li Consieri, excepto sier Andrea Baxadona, levarli la dita tansa per dito tempo, et fu presa: ave una non sincera, 28 di no, 108 de si.

Fo posto, per li Consieri, Cai di XL e Savii, atento le fadighe di sier Ferigo Contarini qu. sier Ambruoso, ha operato per la Signoria nostra, vi-